



ROVVILTNEIMNDA I REGION 1

Vest-Agder, Rogaland, Hordaland og Sogn og Fjordane

Vår dato:

29.01.2019

Vår ref:

2018/908

Dykkar dato:

Dykkar ref:

Klima- og miljødepartementet
Postboks 8013 Dep
0030 OSLO

Klage frå Naturvernforbundet i Agder på vedtak i Rovviltneimnda region 1 om kvotefri jakt på gaupe i 2019

Naturvernforbundet klager på vedtak i Rovviltneimnda region 1 om kvotefri jakt for 2019. Klagen er motteke her 04.01.2019 og er innanfor klagefristen. Naturvernforbundet ber om oppsetjande verknad etter forvaltningslova § 42.

Vedtaket (sak 10/18) i rovviltneimnda 14.12.2018:

Vedtak (samrøystes)

1. Rovviltneimnda opnar for kvotefri jakt på gaupe i heile Region 1 i 2019. Jakttid er 1. februar til 31. mars. For utøving av jakta gjeld reglane i viltlova med tilhøyrande forskrifter.

2. Felling eller forsøk på felling skal så snart som råd meldast til Fylkesmannen. Felte dyr skal dessutan framsynast til Statens naturoppsyn for prøvetaking m.v. med opplysning om kjønn, alder, tidspunkt for felling og fellingsstad.

3. Fangst av gaupe skal utøvast etisk forsvarleg og i samsvar med reglane for bruk av fangstreiskap. Bruk av fangstreiskap krev godkjenning frå Fylkesmannen.

4. Rovviltneimnda kan til ein kvar tid gjere om vedtaket dersom ny informasjon ligg føre.

Nemnda sitt vedtak kan påklagast innan 3 veker frå vedtaket er motteke. Klaga skal handsamast av Klima- og miljødepartementet, men sendast til rovviltneimnda.

Rovviltneimnda hadde saka føre i telefonmøte 14.12.2018. Frå nemnda deltok Aleksander Øren Heen, Gunvor Birkeland, Helen Hjertaas, Helge Nævdal og Aase Simonsen.

Klagen

E-postadresse:
fmvlpst@fylkesmannen.no
Sikker melding:
www.fylkesmannen.no/melding

Postadresse:
Njøsavegen 2
6863 Leikanger

Besøksadresse:
Njøsavegen 2, Leikanger
Statens hus, Kaigaten 9, Bergen
Fjellvegen 11, Førde

Sakshandsamar:
Hermund Mjelstad
Telefon 57643124/ 48143095
fmsfhn@fylkesmannen.no



Naturvernforbundet i Agder meiner gaupe høyrer heime i region 1 som naturleg del av det biologiske mangfaldet. Gaupe har ei nøkkelfunksjon i intakte økosystem, eit krav naturmangfaldlova stiller i § 4. Naturvernforbundet meiner rovviltnemnda sitt vedtak er lite kunnskapsbasert og at påstanden om stort skadepotensiale er ugrunna. Det er heller ikkje vist til skade av gaupe i perioden 01.01.2017 – 01.01.2018. Det er og vist til lågare tap i 2018 i landet av gaupe, jerv og kongeørn, samanlikna med 2017. Naturvernforbundet viser og til klagesak frå Vest-Agder der Miljødirektoratet slo fast at ulv har rett til å ferdast i Vest-Agder utan å bli skoten når det ikkje er skade på husdyr. Naturvernforbundet meiner difor at felling for å hindre potensiell framtidig skade ikkje skal vere automatisk, men det må gjerast ei konkret vurdering av potensiale for skade, om individet er på vandring og om individet er særskild genetisk viktig.

Det er og mogleg å tolke rovviltnemnda sitt vedtak slik at det ikkje skal vere store rovdyr i region 1, sidan de alltid vil utgjere eit skadepotensiale for husdyr.

Naturvernforbundet viser til at rovviltnemnda sitt vedtak strir mot dei avtalane som Noreg er forplikta til for å ta vare på artsmangfaldet, og at det er feil å opne for kvotefri jakt på ein kritisk truga art som gaupe. Vedtaket til nemnda ber preg av å ville utrydde ein art som sjeldan er innom regionen og der det er påvist minimalt med skade på husdyr dei seinare åra.

Vedtaket til rovviltnemnda må opphevast og gaupe må bli freda i regionen. Naturvernforbundet ber og om at klaga blir gjeve oppsetjande verknad etter forvaltningslova § 42.

Vurdering

Region 1 er i ei særstilling når det gjeld forvaltning av dei fire store rovdyra i Noreg. Dette følgjer av St.meld. nr. 15 (2003-2004), Innst. S .nr. 174 (2003-2004) og rovviltforliket av 2011. Det er ikkje mål om yngling av gaupe, jerv, bjørn eller ulv i regionen, og det er understreka at regionen er prioritert for beitebruk. Rovviltnemnda har mynde etter rovviltforskrifta §§ 7 og 11 til m.a. å fastsette jakt på gaupe når bestanden er over det fastsette bestandsmålet for gaupe i regionen. Dette gjeld og i region 1 utan bestandsmål for arten. Fylka i regionen har eit stort tal sau på beite, i 2018 vart det sleppt 719370 sau og lam på utmarksbeite. Skadepotensialet er difor i høgste grad reelt, og dette er då også bakgrunnen for Stortinget sitt syn på den todelte målsettinga for rovviltforvaltninga. Det skal vere ei differensiert forvaltning som skal ta omsyn til viktige beiteområde og at rovdyra skal overleve i Noreg. For region 1 er beitebruken prioritert, og dette har Stortinget vore klar på ved fleire høve.

Når det ikkje er bestandsmål for gaupe i region 1, og beitebruken er prioritert, blir eit av dei viktigaste måla for den regionale forvaltninga å minimere sjansen for at det blir etablert ein bestand av gaupe.

I rovviltforskrifta § 11 og kommentarane til denne står det m.a. «*For gaupe kan rovviltnemnden sette av egne områder for kvotefri jakt i forbindelse med sitt årlige vedtak om kvotejakt på gaupe så lenge dette kan skje innenfor rammen av det nasjonale bestandsmålet for regionen. (...) Det forutsettes videre at rovviltnemnden gjennom sine årlige vedtak om kvoter og eventuelle områder for kvotefri jakt på gaupe bidrar til en størst mulig grad av forutsigbarhet for berørte næringsinteresser. Dette innebærer at områder for kvotefri jakt på gaupe innenfor en region bør være relativt stabile fra år til år.*»

Det har vore kvotefri gaupejakt i region 1 sidan opprettinga av rovviltnemndene i 2005. Det er i hovudsak streifdyr i regionen, og det er få dyr som blir felt under jakta. I 2018 vart det felt ein hanngaupe i Voss kommune (Hordaland) og ei hogaue i Audnedal kommune (Vest-Agder). Totalt er det felt 12 hanngauper og 8 hogauper i regionen sidan 2005 (inkludert to påkøysler og ein i naudverje). Etter rovviltnemnda sitt syn betyr den kvotefrie jakta lite for overlevinga til den nasjonale



bestanden og for det nasjonale bestandsmålet. Den kvotefrie jakta er konfliktdempande ut frå det faktum at skadepotensialet i regionen er stort.

Rovviltnemnda la i sitt vedtak 14.12.2018 til grunn at tala frå Rovdata viser ei svak auke i tal familiegrupper i landet frå 55,5 familiegrupper i 2017 til 57,5 familiegrupper i 2018. Rovviltnemnda finn m.a. på denne bakgrunn ikkje grunn til å endre på vedtaket av 14.12.2018.

Rovviltnemnda hadde klagesaka føre i telefonmøte 01.02.2019. Frå nemnda deltok Aleksander Øren Heen, Gunvor Birkeland, Helen Hjertaas og Aase Simonsen. Vedtaket var samrøystes.

Vedtak

Klagen blir ikkje teken til følgje. Klagen blir med dette oversendt Klima- og miljødepartementet for endeleg avgjerd.

Rovviltnemnda vurderer det slik at klagen ikkje blir gjeve oppsettjande verknad etter § 42 i forvaltningslova. Dette med bakgrunn i regionen sin spesielle stilling som beiteprioritert region, og at det ikkje er nokon fare for at vedtaket vil gå negativt ut over det nasjonale bestandsmålet for gaupe.

Med helsing

Aleksander Heen

Leiar

Rovviltnemnda region 1

Tlf. 91134842

Dokumentet er elektronisk godkjent

Kopi pr. e-post:

Naturvernforbundet i Agder

Miljødirektoratet

Fylkesmennene i region 1